



Aalajangiiffigisassatut siunnersuummut uunga ilanngussa 1 naapertorlugu piaarnerpaamik, kingusinnerpaamillu ulloq 1. oktober 2019-mi atuutilersussamik, Meeqqanut ulloq unnuarlu paaqqinniffinnik pilersitsineq ingerlatsinerlu pillugit Namminersorlutik Oqartussat nalunaarutaannut nr. 1, 25. januaari 2019-imeersuut allannguinnissamik Naalakkersuisut peqquneqarnissaat pillugu Inatsisartunut aalajangiiffigisassatut siunnersuut.

(Inatsisartunut ilaasorta Aqqaluaq B. Egede, Inuit Ataqtigiit)
(Siullermeerneqarnera)

Aallaqqaammut nunatsinni ulloq unnuarlu angerlarsimaffinni sulisut tamaasa Demokratinit qutsavigerusuppagut. Meeqqat sumiginnakkat sullilluaqaasi aamma suliarsi kusanarluinnartuuvoq.

Matumani pivarput nalunaarummi nutaarluinnangajammi paragraffinik arlalinnik allangortitserusunneq pillugu siunnersuut. Naliginnaasumik isumaqartarpunga nalunaarutit nutaat piffissami aalajangersimasuni atuuteqqaartassasut allangortinnginnerini. Naalakkersuisut akissuteqaamminni naqitam aamma taamatut isumaqarput tikkuarlugu ataatsimiinnerni assigisaannilu pineqartoq sukumiisumik piareersarneqarsimasoq taamatullu siunnersuut tusarniutigineqarsimasoq.

Taamatulli oqareerlunga maluginiarpara Naalakkersuisut tusarniaanermut atatillugu akissutinut tusarnaarpallaarsimangitsut. Paasivarami, sulliviit imminnut pigisut tusarniaanermut akissuteqarnerminni nalunaarut iluarisimangikkaat aamma malunnarpoq Naalakkersuisut immikkut taakku tusaaniarsimagaat.

Demokraatinut pingaaruteqarpoq ulloq unnuarlu angerlarsimaffinnik pilersitsigaangatta sapinngisamik qularnaartassagippit pitsaasunik sinaakkuteqarnissaq aamma ingerlatsinerup malittarisassaartinnissaa. Manna siunnersuut aqutugalugu siunnersuuteqartup nalunaarummi nutaami paragraffit arlallit tikkuarpai, isumaqarami naapertuutinningsut. Demokraatini kissaatigaarput nalunaarut nutaaq tamarluinnarmi Ilaqutariinnermut Peqqissutsimullu Ataatsimiititaliamit misissoqqissaarneqassasoq. Tassungalu atatillugu tulluassaaq pisariaqartitsineq naapertorlugu ulloq unnuarlu angerlarsimaffiit sinniisaannik akuutitsisarnissaq.

Oqaaseqarnitsinnut atatillugu isummerfiginiangikkallarparput siunnersuuteqartup taasai paragraffit allangortinneqassanersut peerneqassanersulluunniit. Kisianni oqareernitsitut isumaqarpugut ataatsimiititaliap nalunaarut tamaat qimerlooqqissaartariaqaraa.

Taamatut oqaaseqarluta siunnersuut Ilaqutariinnermut Peqqissutsimullu Ataatsimiititaliamut innersuupparput suliareqqitassanngorlugu aappassaaneerneqannginnerani.